

四庫全書

史部

欽定四庫全書

南史卷八

唐

李

延

壽

撰

梁本紀下第八

太宗簡文皇帝諱綱字世讚小字六通武帝第三子昭明太子母弟也天監二年十月丁未生於顯陽殿五年封晉安王普通四年累遷都督雍州刺史中大通三年被徵入朝未至而昭明太子謂左右曰我夢與晉安王

對奕擾道我以班劍授之王還當有此加乎四月昭明  
太子薨五月丙申立晉安王為皇太子七月乙亥臨軒  
策拜以修繕東宮權居東府四年九月移遷東宮太清  
三年臺城陷太子坐永福省見侯景神色自若無懼容  
五月丙辰帝崩辛巳太子即皇帝位大赦癸未追尊穆  
貴嬪為皇太后追謚妃王氏為簡皇后六月丙戌以南  
康王會理為司空丁亥立宣城王大器為皇太子壬辰  
立當陽公大心為尋陽郡王石城公大欵為江夏郡王

寧國公大臨為南海郡王臨城公大連為南郡王西豐  
公大春為安陸郡王新塗公大成為山陽郡王臨湘公  
大封為宜都郡王高唐公大莊為新興郡王秋七月甲  
寅廣州刺史元景仲謀應侯景西江督護陳霸先攻之  
景仲自殺霸先迎定州刺史蕭勃為刺史庚午以司空  
南康王會理為兼尚書令是月九江大饑人相食者十  
四五八月癸卯征東大將軍開府儀同三司南徐州刺  
史蕭藻薨丙午侯景矯詔儀同三司位比正公自令悉

不加將軍以為定準冬十月丁未地震是月百濟國遣使朝貢見城寺荒蕪哭於闕下

大寶元年春正月辛亥朔大赦改元丁巳天雨黃沙已未西魏剋安陸執司州刺史柳仲禮盡有漢東地丙寅月晝見於東方癸酉前江都令祖皓起義兵於廣陵二月癸未侯景攻下廣陵皓見害乙巳以尚書僕射王克為左僕射丙午侯景逼帝幸西州夏五月丙辰東魏靜帝遜位於齊庚午開府儀同三司鄱陽王範薨自春迄

夏大旱人相食都下尤甚六月庚子前司州刺史羊鴉  
仁自尚書省出奔江陵秋七月戊辰賊行臺任約寇江  
州刺史尋陽王大心以州降之八月甲午湘東王繹遣  
領軍將軍王僧辯逼郢州邵陵王綸棄郢州走九月乙  
亥侯景自進位相國封二十郡為漢王冬十月乙未景  
又逼帝幸西州曲宴自加宇宙大將軍都督六合諸軍  
事立皇子大鈞為西陽郡王大威為武寧郡王打球為  
建安郡王大昕為義安郡王大犖為綏建郡王大圜為

樂梁郡王壬寅侯景害司空南康王會理十一月任約  
進據西陽分兵寇齊昌執衡陽王獻送都下害之湘東  
王繹遣前寧州刺史徐文盛拒約南郡王前中兵參軍  
張彪起義於會稽若邪山攻破浙東諸縣

二年春二月邵陵王綸走至安陸黃城為魏所攻見殺  
三月庚戌魏文帝崩夏閏四月侯景圍巴陵六月乙巳  
解圍宵遁秋七月景還至建鄴八月戊午景遣偽衛尉  
卿彭偃廂公王僧貴入殿廢帝為晉安王害皇太子大

噐尋陽王大心西陽王大鈞武寧王大威建安王大球  
義安王大昕及尋陽王諸子二十餘人矯為帝詔以為  
次當支庶宜歸正嫡禪位於豫章王棟使呂季略送詔  
令帝寫之帝書至先皇念神噐之重思杜稷之固越升  
非次遂主震方嗚咽不能自止賊衆皆為掩泣乃幽帝  
於永福省棟即位改元天正使害南海王大臨於吳郡  
南郡王大連於姑熟安陸王大春於會稽新興王大莊  
於京口冬十月壬寅帝崩於永福省時年四十九賊偽



謚曰明皇帝廟稱高宗明年三月己丑王僧辯平侯景  
率百官奉梓宮升朝堂元帝追崇為簡文皇帝廟號太  
宗四月乙丑葬莊陵帝幼而聰睿六歲便能屬文武帝  
弗之信於前面試帝攬筆立成文武帝歎曰常以東阿  
為虛今則信矣及長器宇寬弘未嘗見喜愠色尊嚴若  
神方頤豐下頰鬚如畫直髮委地雙眉翠色項毛左旋  
連錢入背手執玉如意不相分辨眄睐則目光燭人讀  
書十行俱下辭藻艷發博綜群言善談玄理自十一便

能親庶務歷試藩政所在稱美性恭孝居穆貴嬪憂哀  
毀骨立所坐席霑濕盡爛在襄陽拜表侵魏遣長史柳  
津司馬董當門壯武將軍杜懷寶振遠將軍曹義宗等  
進軍剋南陽新野等郡拓地千餘里及居監撫多所弘  
宥文案簿領纖毫必察弘納文學之士賞接無倦嘗於  
玄圃述武帝所製五經講疏聽者傾朝野雅好賦詩其  
自序云七歲有詩癖長而不倦然帝文傷於輕靡時號  
宮體所著昭明太子傳五卷諸王傳三十卷禮大義二

十卷長春義記一百卷法寶連壁三百卷謝客文湮渭  
三卷玉簡五十卷光明符十二卷易林十七卷竈經二  
卷沐浴經三卷馬槊譜一卷碁品五卷彈碁譜一卷新  
增白澤圖五卷如意方十卷文集一百卷並行於世初  
即位制年號將曰文明以外制強臣取周易內文明而  
外柔順之義恐賊覺乃改為大寶雖在蒙塵尚引諸儒  
論道說義披尋墳史未嘗暫釋及見南康王會理誅知  
不久指所居殿謂舍人殷不害曰龐涓死此下又曰吾

昨夢吞土試思之不害曰昔重耳饋塊卒反晉國陛下  
所夢將符是乎帝曰儻幽冥有徵冀斯言不妄初景納  
帝女潯陽公主公主有美色景惑之妨於政事王偉每  
以為言景以告主主出惡言偉知之懼見讒乃謀廢帝  
而後間主苦勸行殺以絕衆心廢後王偉乃與彭儁王  
修纂進觴於帝曰丞相以陛下幽憂既久使臣上壽帝  
笑曰已禪帝位何得言陛下此壽酒將不盡此乎於是  
儁等并齎酒肴曲項琵琶與帝極飲帝知將見殺乃盡

酣謂曰不圖為樂一至於斯既醉而寢偉乃出偶進土  
囊王修纂坐上乃崩竟協於夢偉撤戶扉為棺遷殯於  
城北酒庫中帝自幽繫之後賊乃撤內外侍衛使突騎  
圍守牆垣悉有枳棘無復紙乃書壁及板鄣為文自序  
云有梁正士蘭陵蕭世讚立身行道終始若一風雨如  
晦鷄鳴不已弗欺暗室豈況三光數至於此命也如何  
又為文數百篇崩後王偉觀之惡其辭切即使刮去有  
隨偉入者誦其連珠三首詩四篇絕句五篇文並悽愴

云

世祖孝元皇帝諱繹字世誠小字七符武帝第七子也  
初武帝夢眇目僧執香爐稱託生王宮既而帝母在米  
女次侍始褰戶幔有風回裾武帝意感幸之米女夢月  
墮懷中遂孕天監七年八月丁巳生帝舉室中非常香  
有紫胞之異武帝奇之因賜米女姓阮進為修容十三  
年封湘東王太清元年累遷為鎮西將軍都督荊州刺  
史三年三月侯景陷建鄴四月世子方等至自建鄴知

臺城不守帝命柵江陵城周四七十里鎮西長史王冲等拜賤請為太尉都督中外諸軍事永制主盟帝不許曰吾於天下不賤寧侯都督之名帝子之尊何藉上台之重議者可斬投筆流淚冲等重請不從又請為司空以上諸侯亦弗聽乃開鎮西府辟天下士是月帝徵兵於湘州刺史河東王譽譽拒命尋上甲侯詔自建鄴至宣三月十五日密詔授帝位假黃鉞大都督中外諸軍事司徒承制於是立行臺於南郡而置官司焉七月遣

世子方等討河東王譽軍敗死之又遣鎮兵將軍鮑泉  
討譽九月乙卯雍州刺史岳陽王譽舉兵寇江陵其將  
杜崩兄弟來降譽遁走鮑泉攻湘州未剋又遣左衛將  
軍王僧辯代將及簡文帝即位改元為大寶元年帝以  
簡文制於賊臣卒不遵用正月使少子方譽質於魏魏  
不受質而約為兄弟四月剋湘州斬譽湘州平雍州刺  
史岳陽王譽自稱梁王蕃於魏魏遣兵助伐襄陽先是  
邵陵王綸書已言凶事祕之以待湘州之捷是月壬寅



始命陳瑩報武帝崩問帝哭於正寢六月江夏王大欸  
山陽王大成宜都王大封自信安來奔九月辛酉以前  
郢州刺史南平王恪為中衛將軍尚書令開府儀同三  
司改封大欸為臨川郡王大成為桂陽郡王大封為汝  
南郡王十一月甲子南平王恪等奉牋進位相國總百  
揆帝不從二年三月侯景悉兵西上閏四月景遣其將  
宋子仙任約襲郢州執刺史方諸庚戌領軍王僧辯屯  
師巴陵五月癸未帝遣將胡僧祐陸法和援巴陵六月

僧祐等擊破景將任約軍禽約景解圍宵遁以王僧辯  
為征東將軍開府儀同三司尚書令帥衆追景所至皆  
捷進圍郢州獲賊將宋子仙等九月盤盤國獻馴象十  
月辛丑朔紫雲如蓋臨江陵城是月簡文帝崩開府儀  
同三司王僧辯等奉表勸進帝奉諱大臨三日百官縞  
素荅表不許司空南平王恪率宗室領軍將軍胡僧祐  
率群僚江州別駕張佚率吏人並奉牋勸進帝固讓十  
一月乙亥僧辯又奉表勸進又不從時巨寇尚存帝未

欲即位而四方表勸前後相屬乃下令斷表

承聖元年二月王僧辯衆軍發自尋陽帝馳檄四方購  
獲景及逆者封萬戶開國公絹布五萬匹三月僧辯等  
平景傳首江陵戊子以賊平告明堂大社己丑僧辯等  
又表勸進曰衆軍以今月戊子總集建康賊景烏伏獸  
窮頻擊頻挫姦竭詐盡深溝自固臣等分勒武旅百道  
同趨突騎短兵犀函鐵楯結隊十群持戟百萬止紂七  
步圍項三重轟然大潰群凶四滅京師少長俱稱萬歲

長安酒食於此價高九縣雲開六合清朗矧伊黔首誰  
不載躍伏惟陛下咀痛茹哀嬰憤忍酷自紫庭絳闕胡  
塵四起塙垣好時冀馬雲屯泣血臨兵嘗膽誓衆而吳  
楚一家方與七國俱反管蔡流言又以三監作亂西涼  
義衆阻秦塞而不通并州遺黎跨飛狐而見絕豺狼當  
路非止一人鯨鯢不梟脩焉五載英武克振怨恥並雪  
永尋霜露伊何可勝臣等輒依故實奉修社廟使者持  
節分告園陵嗣后升遐龍輜未殯承華掩曜梓宮莫測

並卽隨由備辦禮具凶荒四海同哀六軍袒哭聖情孝  
友理當感慟日者百司岳牧仰祈宸鑒以錫珪之功既  
歸有道當璧之禮允屬聖明而優詔謙沖杳然凝邈飛  
龍可躋而乾爻在四帝閣云叫而門闔未聞謳歌再馳  
是用翹首所以越人固執熏丹穴以求君周人樂推踰  
岐山而事主漢王不卽位無以貴功臣光武止蕭王豈  
謂紹宗廟黃帝迷於襄城尚訪御人之道放勛寂於姑  
射猶使樽俎有歸伊此儻來豈聖人所欲帝王所應不

獲已而然伏讀璽書尋諷制旨領懷物外未奉慈衷陛下日角龍顏之姿表於徇齊之日彤雲素靈之瑞基於應物之初博學則大哉無所與名深言則曄乎文章之觀忠為令德孝實動天加以英威茂略雄圖武算指麾則丹浦不戰顧眄則阪泉自蕩地維絕而重紐天柱傾而更植鑿河津於孟門百川復啓補穹儀以五石萬物再生縱陛下拂袵衣而游廣城登嶠山而去東土群臣安得仰訴兆庶何所歸仁况郊祀配天壘籩禮曠齋宮

清廟匏竹不陳仰望鸞輿匪朝伊夕瞻言法駕載渴且  
饑豈可久稽衆議有曠彝則舊邦凱復函洛已平高奴  
櫟陽宮館雖毀濁河清渭佳氣猶存率門有亢甘泉四  
敞土圭測景仙人承露斯蓋九州之赤縣六合之樞機  
博士捧圖書而稍還太常定禮儀其已立豈得不揚清  
警而赴名都具玉鑾而旋正寢昔東周既遷鎬京遂其  
不復長安一亂邾洛永以為居夏后以萬國朝諸侯文  
王以六州匡天下方之跡基百里劒杖三尺以殘楚之

地抗拒六戎一旅之卒剪夷三叛坦然大定御辯東歸  
解五牛於冀州秣六馬於譙郡緬求前古其可得歟對  
揚天命無所讓德有理存焉敢重祈奏帝尚未從辛卯  
宣猛將軍朱買臣奉帝密旨害豫章王棟及其二弟橋  
樛四月乙巳益州刺史新除假黃鉞太尉武陵王紀僭  
位於蜀年號天正帝遣兼司空蕭泰祠部尚書樂子雲  
拜謁陞陵修復社廟丁巳下令解嚴五月庚午司空南  
平王恪及宗室王侯大都督王僧辯等復拜表上尊號



帝猶固讓甲申以開府儀同三司江州刺史王僧辯為  
司徒乙酉斬賊左僕射王偉尚書呂李略少府卿周石  
珍舍人嚴置於江陵市乃下令赦境內齊將潘樂辛術  
等攻秦郡王僧辯遣將杜崩帥衆拒之以陳霸先為征  
北大將軍開府儀同三司徐州刺史齊人賀平侯景八  
月武陵王紀率巴蜀之衆東下遣護軍將軍陸法和屯  
巴峽以拒之九月甲戌司空南平王恪薨十月乙未前  
梁州刺史蕭循自魏至江陵以為平北將軍開府儀同

三司戊申執湘州刺史王琳於殿內庚戌琳長史陸納  
及其將潘烏累等舉兵反攻陷湘州是月四方征鎮王  
公卿士復勸進表三上乃許之冬十一月丙子皇帝即  
位於江陵改太清六年為承聖元年逋租宿責並許弘  
宥孝子順孫悉皆賜爵長徒鎖士特加原宥禁錮奪勞  
一皆曠蕩是日帝不升正殿公卿陪列而已時有兩日  
俱見巳卯立王太子方矩為皇太子改名元良立皇子  
方智為晉安郡王方畧為始安郡王追尊所生妣阮修

容為文宣太后改謚忠壯太子為武烈太子封武烈子  
莊為永嘉王是月陸納遣將軍潘烏累等破衡州刺史  
丁道貴於涑口道貴走零陵十二月陸納分兵襲巴陵  
湘州刺史蕭循擊走之天門山獲野人出山三日而死  
星隕吳郡淮南有野象數百壞人室廬宣城郡猛獸暴  
食人是歲魏廢帝元年

二年春正月乙丑詔王僧辯討陸納戊寅以吏部尚書  
王褒為尚書僕射己卯江夏宮南門鑰壯飛三月庚寅

有兩龍見湘州西江夏五月甲申魏大將尉遲迴進兵  
逼巴西潼州刺史楊乾運以城納迴己丑武陵王紀軍  
至西陵六月乙卯王僧辯平湘州秋七月武陵王紀衆  
大潰見殺八月戊戌尉遲迴平蜀九月齊遣鄒元建及  
將邢杲遠步六汗薩東方老帥衆頓合肥冬十一月辛  
酉僧辯留鎮姑熟豫州刺史侯瑱據東關壘徵吳興太  
守裴之橫帥衆繼之戊戌以尚書僕射王褒為左僕射  
湘東太守張綰為右僕射十二月宿豫土人東方光據

城歸北齊江西州郡皆起兵應之

三年春正月魏帝為相安定公所廢而立齊王廓是為恭帝元年三月主衣庫見黑蛇長丈許數十小蛇隨之舉頭高丈餘南望俄失所在帝又與宮人幸玄洲苑復見大蛇盤屈於前群小蛇遶之並黑色帝惡之宮人曰此非怪也恐是錢龍帝敕所司即日取數千萬錢鎮於蛇處以厭之因設法會赦囚徒振窮乏退居栖心省又

有蛇從屋墮落帝帽上忽然便失又龍光殿上所御肩

與復見小蛇縈屈輿中以頭駕夾膝前金龍頭上見人  
走去逐之不及城濠中龍騰出煥爛五色竦躍入雲六  
七小龍相隨飛去群魚騰躍墜死於陸道龍處為窟若  
數百斛圖舊大城上常有紫氣至時稍復消歇甲辰以  
司徒王僧辯為太尉車騎大將軍戊申以護軍將軍郢  
州刺史陸法和為司徒夏四月癸酉以征北大將軍開  
府儀同三司陳霸先為司空六月癸未有黑氣如龍見  
於殿內秋九月辛卯帝於龍光殿述老子義先是魏使

宇文仁恕來聘齊使又至江陵帝接仁恕有闕魏相安  
定公憾焉乙巳使柱國萬紐于謹來攻冬十月丙寅魏  
軍至襄陽梁王蕭譽率衆會之丁卯停講內外戒嚴輿  
駕出行城柵大風拔木丙子續講百寮戎服以聽詔徵  
王僧辯十一月甲申幸津陽門講武置南北兩城主帝  
親觀閱風雨總集部分未交旗幟飄亂帝趣駕而回無  
復次序風雨隨息衆竊驚焉乙酉以領軍胡僧祐為都  
督城東城北諸軍事右僕射張綰為副左僕射王褒都

督城西城南諸軍事直殿省元景亮為副丁亥魏軍至  
柵下丙申徵廣州刺史王琳入援丁酉大風城內火燒  
居人數千家以為失在婦人斬首尸之是日帝猶賦詩  
不廢以胡僧祐為開府儀同三司庚子信州刺史徐世  
譜晉安王司馬任約軍次馬頭岸是夜有流星墜城中  
帝援蓍筮之卦成取龜式驗之因抵於城曰吾若死此  
下豈非命乎因裂帛為書催僧辯曰吾忍死待公可以  
至矣戊申胡僧祐朱買臣等出戰買臣敗績辛亥魏軍



大攻帝出枇杷門親臨陣督戰偪中流矢薨軍敗反者斬西門守卒以納魏軍帝見執如梁王蕭譽營甚見詰辱他日乃見魏僕射長孫儉謫儉云埋金千斤於城內欲以相贈儉乃將帝入城帝因述譽相辱狀謂儉曰向聊相謫欲言耳豈有天子自埋金乎儉乃留帝於主衣庫十二月丙辰徐世譜任約退戍巴陵辛未魏人戕帝明年四月梁王方智承制追尊為元皇帝廟號世祖帝聰悟俊朗天才英發出言為論音響若鍾年五六歲

武帝嘗問所讀書對曰能誦曲禮武帝使誦之即誦上篇左右莫不驚歎初生患眼醫療必增武帝自下意療之遂盲一目乃憶先夢彌加慙愛及長好學博極群書武帝嘗問曰孫策在江東於時年幾荅曰十七武帝曰正是汝年帝性不好聲色頗慕高名為荊州刺史起州學宣尼廟嘗置儒林參軍一人勸學從事二人生三十人加廩餼帝工書善畫自圖宣尼像為之贊而書之時人謂之三絕與裴子野劉顯蕭子雲張纘及當時才秀

為布衣交常自比諸葛亮桓溫惟續許焉性好矯飾多猜忌於名無所假人微有勝已者必加毀害帝姑義興昭長公主子王銓兄弟八九人有盛名帝妬害其美遂改寵姬王氏兄王珣名琳以同其父名忌劉之遴學使人鵠之如此者甚衆雖骨肉亦徧被其禍始居文宣太后憂依丁蘭作木母及武帝崩祕喪逾年乃發凶問方刻檀為像置於百福殿內事之甚謹朝夕進蔬食動靜必啓聞迹其虛矯如此性愛書籍既患目多不自執卷

置讀書左右番次上直晝夜為常略無休已雖睡卷猶不釋五人各伺一更恒致達曉常眠熟大鼾左右有睡讀失次第或偷卷度紙帝必驚覺更令追讀加以撻楚雖戎略殷湊機務繁多軍書羽檄文章詔誥點毫便就殆不游手常曰我韜於文士愧於武夫論者以為得言始在尋陽夢人曰天下將亂王必維之又背生黑子巫媼見曰此大貴不可言初武帝勅賀革為帝府諮議使議三禮革西上意甚不悅過別御史中丞江革江革告

之曰吾嘗夢主上徧見諸子至湘東王脫帽授之此人  
後必當壁卿其行乎華頴之及太清之禍遂膺歸運自  
侯景之難州郡大半入魏自巴陵以下至建康緣以長  
江為限荊州界北盡武寧西拒峽口自嶺以南復為蕭  
勃所據文軌所同千里而近人戶著籍不盈三萬中興  
之盛盡於是矣武陵之平議者欲因其舟艦遷都建鄴  
宗懔黃羅漢皆楚人不願移帝及胡僧祐亦俱未欲動  
僕射王褒左戶尚書周弘正驟言即楚非使宗懔及御

史大夫劉懿以為建鄴王氣已盡且渚宮洲已滿百於是乃留尋而歲星在井熒惑守心帝觀之慨然而謂朝臣文武曰吾觀玄象將恐有賊但吉凶在我運數由天避之何益及魏軍逼閣人朱買臣按劔進曰惟有斬宗慄黃羅漢可以謝天下帝曰曩實吾意宗黃何罪二人退入於人中及魏人燒柵買臣謝荅仁勸帝乘暗潰圍出就任約帝素不便馳馬曰事必無成徒增辱耳荅仁又求自將帝以問僕射王褒褒曰荅仁侯景之黨豈是

可信成彼之勲不如降也乃聚圖書十餘萬卷盡燒之  
荅仁又請守子城收兵可得五千人帝然之即授城內  
大都督以帝鼓吹給之配以公主既而又召王褒謀之  
荅仁請入不得歐血而去遂使皇太子王褒出質請降  
有頃黃門即裴政犯門而出帝乘白馬素衣出東門抽  
劒擊闔曰蕭世誠一至此乎魏師至凡二十八日徵兵  
四方未至而城見剋在幽逼求酒飲之製詩四絕其一  
曰南風且絕唱西陵最可悲今日還萬里終非封禪時

其二曰人世逢百六天道異貞恒何言異螻蟻一旦損  
鵬鵬其三曰松風侵曉哀霜零當夜來寂寥千載後誰  
畏軒轅臺其四曰夜長無歲月安知秋與春原陵五樹  
杏空得動耕人梁王謦遣尚書傳準監行刑帝謂之曰  
卿幸為我宣行準捧詩流淚不能禁進土囊而殯之梁  
王謦使以布帊纏屍斂以蒲席束以白茅以車一乘葬  
於津陽門外愍懷太子元良及始安王方略等皆見害  
徐世譜任約自馬頭走巴陵約後降於齊將軍裴縱縱



弟機並被害謝荅仁三人相抱俱見屠汝南王大封尚書左僕射王褒以下並為俘以歸長安乃選百姓男女數萬口分為奴婢小弱者俱殺之帝於伎術無所不該嘗不得南信筮之遇剝之艮曰南信已至今當遣左右季心往看果如所說賓客咸驚其妙凡所占決皆然初從劉景受相術因訊以年荅曰未至五十當有小厄禳之可免帝自勉曰苟有期會禳之何益及是四十七矣特多禁忌墻壁崩倒屋宇傾頽年月不便終不修廟庭

草蕪沒令鞭去之其慎護如此著孝德傳忠臣傳各三十卷丹陽尹傳十卷注漢書一百十五卷周易講疏十卷內典博要百卷連山三十卷詞林三卷玉韜金樓子補闕子各十卷老子講疏四卷懷舊傳二卷古今全德志荆南地記貢職圖古今同姓名錄一卷策經十二卷式贊三卷文集五十卷初承聖二年三月有二龍自南郡城西升天百姓聚觀五采分明江陵故老竊相泣曰昔年龍出建康淮西天下大亂今復有焉禍至無日矣

帝聞而惡之踰年而遭禍又江陵先有九十九洲古老  
相承云洲滿百當出天子桓玄之為荊州刺史內懷篡  
逆之心乃遣鑿破一洲以應百數隨而崩散竟無所成  
宋文帝為宜都王在藩一洲自立俄而文帝纂統後遇  
元凶之禍此洲還沒太清末枝江楊之閣浦復生一洲  
郡公上疏稱慶明年而帝即位承聖末其洲與大岸相  
通惟九十九云

敬皇帝諱方智字慧相小字法真元帝第九子也太清

三年封興梁侯承聖元年封晉安郡王二年出為江州刺史三年十一月魏剋江陵太尉王僧辯司空陳霸先定議以帝為梁王太宰承制四年二月癸丑於江州奉迎至建鄴入居朝堂以太尉王僧辯為中書監錄尚書驃騎大將軍都督中外諸軍事加司空陳霸先班劍二十人以湘州刺史蕭循為太尉廣州刺史蕭勃為司徒三月齊遣其上黨王高渙送貞陽侯蕭明來王梁嗣至東關遣吳興太守裴之橫拒之與戰敗績死之四月司

徒陸法和以郢州附齊遣江州刺史侯瑱討之七月辛  
丑僧辯納貞陽侯蕭明自米石濟江甲辰入建鄴丙午  
即偽位年號天成以帝為皇太子司空陳霸先襲殺王  
僧辯黜蕭明而奉帝焉

紹泰元年秋九月丙午皇帝即位冬十月己巳大赦改  
元以貞陽侯蕭明為司徒封建安郡公壬子加司空陳  
霸先尚書令都督中外諸軍事震州刺史杜龕舉兵攻  
信武將軍陳蒨於長城義興太守韋載應之癸丑以太

尉蕭循為太保以司徒蕭明為太傅司徒蕭勃為太尉以鎮南將軍王琳為車騎將軍開府儀同三司戊午尊所生夏貴妃為皇太后立妃王氏為皇后辛未司空陳霸先東討韋載降之丙子南豫州刺史任約譙秦二州刺史徐嗣徽舉兵據石頭反十一月庚辰齊安州刺史翟子崇楚州刺史柳達摩率衆赴任約入石頭十二月庚戌任約徐嗣徽等至米石迎齊援丙辰遣猛烈將軍侯安都於江寧邀擊敗之約嗣徽等奔江西庚申翟子

崇等降並放還北

太平元年春正月戊寅大赦追贈諡簡文帝諸子封故  
永安侯確子後為邵陵王奉攜王後癸未震州刺史杜  
龕降詔賜死赦吳興郡己亥以太保宜豐侯蕭循襲封  
鄱陽王東揚州刺史張彪圍臨海太守王懷振於剡岩  
二月庚戌遣周文育陳蒨襲會稽討彪敗走以中衛將  
軍臨川王大款即本號開府儀同三司丙辰若邪村人  
斬張彪傳首建鄴赦東揚州甲子以東土經杜龕張彪

之亂遣大使巡省是月齊人來聘使侍中王廓報聘三月壬午班下遠近並雜用今古錢戊戌齊將蕭軌出柵口向梁山陳霸先大敗之夏四月壬申侯安都輕兵襲齊行臺司馬恭於歷陽大破之五月癸未太傅建安公蕭明薨庚寅齊軍水步入丹陽縣內外纂嚴六月壬子齊軍至玄武湖西北乙卯陳霸先大破齊軍戊午大赦辛酉解嚴秋七月丙子司空陳霸先進位司徒丁亥以開府儀同三司侯瑱為司空八月己酉太保郗陽王循



薨九月壬寅大赦改元司徒陳霸先進位丞相錄尚書  
事改封義興郡公加中權將軍王冲開府儀同三司以  
吏部尚書王通為尚書右僕射冬十月乙亥魏相安定  
公薨十一月起雲龍神武門十二月壬申進太尉蕭勃  
為太保甲午封前壽昌令劉叡為汝陰王前鎮西法曹  
行參軍蕭沅為巴陵王奉宗齊二代後庚子魏恭帝遜  
位於周

二年春正月壬寅詔求魯國孔氏族為奉聖侯并繕廟

堂供備祀典又詔諸州各置中正舊放舉選不得輒承單狀序官皆須中正押上然後量授其選中正每求者德該悉以他官領之以開府儀同三司王琳為司空以尚書右僕射王通為左僕射二月庚午遣領軍將軍徐度入東關太保廣州刺史蕭勃舉兵反詔平西將軍周文育平南將軍侯安都等南討戊子徐度至合肥燒齊船舶三千艘癸巳周文育軍於巴山獲蕭勃偽帥歐陽頔三月甲寅德州刺史陳法武前衡州刺史譚遠於始

興攻殺蕭勃夏四月癸酉曲赦江廣衡三州并督內為  
賊所拘逼者已卯鑄四柱錢一當二十齊遣使通和壬  
辰改四柱錢一當十丙申復用細錢五月乙巳平西將  
軍周文育進號鎮南將軍平南將軍侯安都進號鎮北  
將軍並開府儀同三司戊辰余孝頃遣使詣丞相府求  
降秋八月加丞相陳霸先殊禮九月周冢宰宇文護殺  
閔帝丞相陳霸先改授相國封陳國公冬十月戊辰進  
陳國公爵為王辛未帝遜位於陳陳受命奉帝為江陰

王薨于外邸時年十六追謚敬皇帝

論曰帝王之位天下之重職文武之道守國所常遵其於行用義均水火相資則可專任成亂觀夫有梁諸帝皆一之而已簡文文明之姿稟乎天授粵自支庶入居明兩經國之算其道弗聞官體所傳且變朝野雖上虛號何救滅亡元帝居勢勝之地啓中興之業旣雪讐恥且應天人而內積猜忍外崇矯飾攀號之節忍酷於踰年定省之制申情於水偶竟而雍州引寇釁起河東之

戮益部親尋事習邵陵之窘悖辭屈於僧辯殘虐極於  
圓正不義不昵若斯之甚而復謀無經遠心勞志大近  
捨宗國遠逼強鄰外弛藩籬內崇講肄卒於溘至戕隕  
方追始皇之迹雖復文籍滿腹何救社廟之墟歷觀書  
契以來盖亦廢興代有未見三葉遺愍頓若蕭宗之酷  
敬皇以此冲年當斯頽運將不高揖其可得乎初武帝  
末年都下用錢每百皆除其九謂為九佰竟而有侯景  
之亂及江陵將覆每百復除六文稱為六佰識者以為

九者陽九六者百六盖符歷數非人事也善乎鄭文貞  
公論之曰高祖固天攸縱聰明稽古道亞生知學為博  
物允文允武多藝多才爰自諸生有不羈之度屬昏凶  
肆虐天倫及禍糾合義旅將雪家冤曰紂可伐不期而  
會龍躍樊漢電擊湘郢剪離德如振槁取獨夫如拾遺  
其雄才大略固無得而稱矣既縣白旗之首方應皇天  
之眷布德施惠悅近來遠開蕩蕩之王道草靡靡之商  
俗大修文教盛飾禮容鼓扇玄風開揚儒業介冑仁義

折衝尊俎聲振寰宇澤流遐裔干戈載戢凡數十年濟濟焉洋洋焉魏晉以來未有若斯之盛也然不能息末敦本斲彫為樸慕名好事崇尚浮華抑揚孔墨流連釋老或終夜不寢或日旰不食非弘道以利物惟飾智以驚愚且心未遺榮虛廁蒼頭之伍高談脫屣終戀黃屋之尊夫人之大欲在乎飲食男女至於軒冕殿堂非有切身之急高祖屏除嗜欲眷戀軒冕得其所難而滯於所易可謂神有所不達智有所不通矣逮夫精華稍竭

鳳德已衰惑於聽受權在奸佞儲后百辟莫能盡言險  
躁之心暮年愈甚見利而動愎諫違卜開門揖盜棄好  
即讐釁起蕭牆禍成戎羯身殞非命災被億兆衣冠斃  
鋒鏑之下老幼粉戎馬之足瞻彼黍離痛深周廟永言  
麥秀悲甚殷墟自古以安為危既成而敗顛覆之速書  
契所未聞也易曰天之所助者順人之所助者信高祖  
之遇斯屯剝不得其死蓋動而之險不由信順失天人  
之助其能免於此乎太宗敏叡過人神米秀發多聞博



達富瞻詞藻然文艷用寡華而不實體窮淫麗義罕疏  
通哀思之音遂移風俗以此而貞萬國異乎周誦漢莊  
矣我生不辰載離多難桀逆構扇巨猾滔天始同崩里  
之拘終類望夷之禍悠悠蒼昊其可問哉昔國步初屯  
兵纏魏闕群后釋位投袂勤王元帝以盤石之宗受分  
陝之任屬君親之難居連率之長不能撫劍嘗膽枕戈  
泣血躬先士卒致命前驅遂乃擁衆逡巡內懷缺望坐  
觀國變以為身幸不急莽卓之誅先行昆弟之戮又沉

猜忍酷多行無禮騁智辯以飾非肆忿戾以害物爪牙  
重將心膂謀臣或顧眄以就拘囚或一言而反茹醢朝  
之君子相顧慄然自謂安若太山算無遺策怵於邪說  
即安荆楚雖元惡克翦社稷未寧而西隣責言禍敗旋  
及斯乃上靈降鑒此焉假乎天道人事其可誣乎其篤  
志藝文採浮華而棄忠信戎昭果毅先骨肉而後寇讐  
口誦六經心通百氏有仲尼之學有公旦之才適足以  
益其驕矜增其禍患何補金陵之覆沒何救江陵之滅

亡哉敬帝遭家不造紹茲屯運征伐有所自出政刑不  
由於已時無伊霍之輔焉得不為高讓歟



南史卷八

南史卷八考證

簡文帝紀三月己丑王僧辯平侯景○己丑梁書作癸

丑

弘納文學之士○弘梁書作引

孝元帝紀齊將潘樂辛術等攻秦郡○梁書齊作魏樂  
作洛

十月乙未前梁州刺史蕭循自魏至江陵○乙監本訛  
已今从梁書及上下文改正

齊遣郭元建及將邢杲遠步六汗薩東方老帥衆頓合  
肥○六監本訛大今从閣本

其虛矯如此○矯監本訛矯今改从南本

敬帝紀十一月庚辰齊安州刺史翟子崇楚州刺史柳  
達摩率衆赴任約入石頭○梁書陳書皆作楚州刺  
史劉仕榮淮州刺史柳達摩又見於下卷陳武帝紀  
此脫去劉仕榮淮州刺史七字

齊將蕭軌出柵口向梁山○軌監本訛軌今从齊書梁

書陳書改正

南史卷八考證

欽定四庫全書

史部  
南史卷十九

詳校官編修<sub>臣</sub>裴謙

洗馬<sub>臣</sub>王坦修覆勘

覆校官主事<sub>臣</sub>李駿

校對官中書<sub>臣</sub>王鍾泰

謄錄監生<sub>臣</sub>張麟



欽定四庫全書

南史卷九

唐

李

延

壽

撰

陳本紀上第九

陳高祖武皇帝諱霸先字興國小字法生吳興長城下  
若里人姓陳氏其本甚微自云漢太丘長實之後也實  
玄孫晉太尉準準生匡匡生達永嘉中南遷爲丞相掾  
太子洗馬出爲長城令悅其山水遂家焉嘗謂所親曰

此地山川秀麗常有王者興焉二百年後我子孫必鍾  
斯運達生康復爲丞相掾咸和中土斷故爲長城人康  
生盱眙太守英英生尚書郎公弼公弼生步兵校尉鼎  
鼎生散騎侍郎高高生懷安令詠詠生安成太守猛猛  
生太常卿道巨道巨生皇考文讚帝以梁天監二年癸  
未歲生少俶儻有大志長於謀畧意氣雄傑不事生產  
及長涉獵史籍好讀兵書明緯候孤虛遁甲之術多武  
藝明達果斷爲當時推服身長七尺五寸日角龍顏垂

手過膝嘗游義興館於許氏夢天開數丈有四人朱衣捧日而至納之帝口及覺腹內猶熱帝心獨喜初仕鄉爲里司後至建鄴爲油庫吏徙爲新喻侯蕭映傳教勤於其事爲映所賞及映爲吳興太守甚重帝謂僚佐曰此人將來遠大必勝於我及映爲廣州帝爲中直兵參軍隨之鎮映令帝招集士馬先是武林侯蕭諮爲交州刺史以嚴刻失和土人李賁連結數州豪傑同時反臺遣高州刺史孫罔新州刺史盧子雄將兵擊賁罔等不

時進皆於廣州伏誅子雄弟子畧與罔子姪及其主帥  
杜天合杜僧明共舉兵執南江督護沈顗進寇廣州晝  
夜苦攻州中震恐帝率精兵救之賊衆大潰僧明後有  
功業遂降梁武帝深歎異焉授直閣將軍封新枋縣子  
仍遣圖帝貌而觀之其年冬蕭映卒明年帝送喪還至  
大庾嶺會有詔以帝爲交州司馬與刺史楊暕南討帝  
益招勇敢器械精利暕委帝經畧時蕭勃爲定州刺史  
於西江相會勃知軍上憚遠役因詭說留暕集諸將

問計帝曰交趾叛渙罪由宗室節下奉辭伐罪故當死  
生以之於是鼓行而進軍至交州驃推帝為前鋒所向  
摧陷賁竄入屈獠洞中屈獠斬賁傳首建鄴是歲太清  
元年也賁兄天寶遁入九真與劫帥李紹隆收餘兵殺  
德州刺史陳文戒進圍愛州帝討平之除西江督護高  
要太守矜七郡諸軍事二年冬侯景寇逼帝將赴援廣  
州刺史元景仲陰將圖帝帝知之與成州刺史王懷明  
等集兵於南海馳檄以討景仲景仲縊於閣下帝迎蕭

勃鎮廣州時臨賀內史歐陽頤監衡州蘭裕蘭京禮扇  
誘始興等十郡共攻頤頤請援於勃勃令帝救之悉禽  
裕等仍監始興郡事帝遣杜僧明胡頴將二十人頓於  
嶺上并厚結始興豪傑同謀義舉侯安都張偲等率衆  
來附蕭勃聞之遣鍾休悅說停帝帝泣謂休悅曰君辱  
臣死誰敢愛命僕行計決矣時蔡路養起兵據南康勃  
遣腹心譚世遠為曲江令與路養相結同過義軍大寶  
元年正月帝發始興次大庾嶺大破路養軍進頓南康

湘東王繹承制授帝交州刺史改封南野縣伯於是修理崎頭古城徙居之劉惠騫等望見恒有紫氣冒城上遠近驚異故惠騫等深自結於帝尋改封長城縣侯南江州刺史時寧都人劉藹等資高州刺史李遷仕舟艦兵仗將襲南康帝遣杜僧明等據白口禦之二年僧明禽遷仕送南康斬之承制授帝江州刺史帝發南康瀨石舊有二十四灘灘多巨石行旅以為難帝之發水暴起數丈三百里間巨石皆沒進軍頓西昌有龍見水濱

高五丈五米鮮曜軍人觀者數萬人帝又嘗獨坐胡牀  
於閣下忽有神光滿閣廊廡之間並得相見趙知禮侍  
側怪而問帝帝笑不答時承制遣征東將軍王僧辯督  
衆軍討侯景次盩厔帝率杜僧明等合三萬將會焉時  
西軍乏食帝先計軍糧五十萬石至是分三十萬石以  
資之仍頓巴丘會侯景廢簡文立豫章嗣王棟帝遣兼  
長史沈袞奉表於江陵勸進承制授帝東揚州刺史領  
會稽太守三年帝帥師發自豫章二月次桑落洲時僧



辯已發盆城會帝於白茅灣乃登岸結壇刑牲盟約進次大雷軍人杜稜夢雷池君周何神自稱征討大將軍乘朱航陳甲仗稱下征侯景湏臾便還云已殺景竟三月帝與諸軍進剋姑熟仍次蔡洲侯景登石頭城望官軍之盛不悅曰一把子人何足可打密謂左右曰此軍上有紫氣不易可當乃以舢舨貯石沉塞淮口緣淮作城自石頭迄青溪十餘里中樓雉相接僧辯遣杜崩問計於帝帝以諸將不敢當鋒請先往立柵即於石頭西

橫墉築柵衆軍次連八城直出東北賊恐西州路斷亦於東北果林作五城以遏大路帝曰善用兵者如常山之蛇使救首救尾困而無暇令我師旣衆賊徒甚寡應分賊兵力以弱制彊乃命諸將分處置兵帝與王琳杜龕等悉力乘之景衆大潰偁辯啓命帝鎮京口五月齊遣將辛術圍嚴超達於秦郡帝命徐度領兵助其固守齊衆起土山穿地道攻之甚急帝乃自率萬人解其圍振旅南歸承制授帝征北大將軍開府儀同三司南徐

州刺史進封長城縣公及王僧辯征陸納於湘州承制  
命帝代鎮揚州承聖二年湘州平帝旋鎮京口三年三  
月進帝位司空及魏平江陵帝與王僧辯等進啓請晉  
安王以太宰承制十二月晉安王至自尋陽入居朝堂  
給帝班劍二十人四年五月齊送貞陽侯明還主社稷  
王僧辯納之明即位改元天成以晉安王為皇太子初  
齊之納貞陽也帝固爭之以為不可不見從帝居常憤  
歎曰嗣主高祖之孫元皇之子竟有何事坐致廢黜假

立非次此情可知乃密具袍數千領及錦綿金銀以為  
賞賜之資九月壬寅帝召徐度侯安都周文育仍部列  
將士水陸俱進夜發南徐州討王僧辯甲辰帝至石頭  
前遣勇士自城北踰入時僧辯方視事聞外白有兵遽  
走帝大兵尋至因風縱火僧辯就禽是夜縊之及其子  
顧於是廢貞陽侯而奉晉安王即位改承聖四年為紹  
泰元年壬子詔授帝侍中大都督中外諸軍事車騎將  
軍揚南徐二州刺史持節司空班劍鼓吹並如故仍詔

甲仗百人出入殿省震州刺史杜龕據吳興與義興太守韋載舉兵逆命辛未帝表自東討留高州刺史侯安都石州刺史杜陵宿衛臺省甲戌軍至義興秦州刺史徐嗣徽據城入齊又要南豫州刺史任約舉兵應龕齊人資其兵食嗣徽乘虛奄至闕下侯安都出戰嗣徽等退據石頭丁丑載及龕從弟北叟來降帝撫而釋之仍以載充鼎知郡事以嗣徽寇逼卷甲還都命周文育進討杜龕十一月己卯齊遣兵五千度據姑熟又遣安州

刺史翟子崇楚州刺史劉士榮淮州刺史柳達摩領兵  
萬人於胡墅度米粟三萬石馬千匹入石頭帝乃遣侯  
安都領水軍夜襲胡墅燒齊船周鐵武率舟師斷齊運  
輸帝領鐵騎自西明門襲之齊人大潰嗣徽留達摩等  
守城自率親屬腹心往南州米石以迎齊援先是太白  
自十一月丙戌不見十二月乙卯出於東方丙辰帝盡  
命衆軍分部甲卒對治城日立航度兵攻其水南二柵  
柳達摩等度淮置陣帝督兵疾戰縱火燒柵煙塵漲天

齊人大潰盡收其船艦是日嗣徽約等領齊兵還據石頭帝遣侯安都領水軍襲破之嗣徽等單舸脫走丁巳拔石頭南岸柵移度北岸起柵以絕其汲路又堙塞東門故城中諸井齊所據城中無水水一合買米一升一升米買絹一疋或炒米食之達摩謂其衆曰頃在北童謠云石頭擣兩襠擣青復擣黃侯景服青已倒於此今吾徒衣黃豈謠言驗邪庚申達摩遣侯子欽劉士榮等請和帝許之乃於城外盟約其將士恣其南北辛酉帝

出石頭南門陳兵送齊人歸北者及至齊人殺之壬戌  
齊和州長史烏丸遠自南州奔還歷陽江寧令陳嗣黃  
門侍郎曹朗據姑熟不從帝命侯安都徐度等討平之  
聚其首為京觀是月杜龕以城降二年正月癸未誅龕  
其弟翕從弟北叟司馬沈孝敦並賜死三月戊戌齊遣  
水軍儀同蕭軌庠狄伏連堯難宗東方老侍中裴英起  
東廣州刺史獨孤辟惡洛州刺史李希光并任約徐嗣  
徽王僧惜等衆十萬出柵口向梁山帳內盪主黃叢逆



擊敗之燒其前軍船艦齊頓軍保蕪湖五月丙申齊兵至秣陵故城巳亥帝率宗室王侯及朝臣於大司馬門外白虎闕下刑牲告天以齊人背約發言慷慨涕泗交流士卒觀者益奮辛丑齊軍於秣陵故城跨淮立橋柵引度兵馬癸卯自方山進及兒塘游騎至臺都下震駭帝潛以精卒三千配沈泰度江襲齊行臺趙彥深於瓜步獲其舟粟六月甲辰齊兵潛至鍾山龍尾丁未進至莫府山帝遣錢明領水軍出江乘要擊齊人糧運盡獲

之齊軍大餒殺馬驢而食之壬子齊軍至玄武湖西北  
莫府山南將據北郊壇衆軍自覆舟東移頓郊壇北與  
齊人相對其夜大雨震電暴風拔木平地水丈餘齊軍  
晝夜坐立泥中縣邑以燮足指皆爛而臺中及潮溝北  
水退路燥官軍每得番易甲寅少霖是時食盡調市人  
餽軍皆是麥屑為飯以荷葉裹而分給問以麥餅兵士  
皆困會文帝遣送米三十石鴨千頭帝即炊米煮鴨誓  
申一戰士及防身計糧數鬻人人裹飯混以鴨肉帝命

衆軍蓐食攻之齊軍大潰執嗣徽及其弟嗣宗斬之以  
徇虜蕭軌東方老王敬寶李希光裴英起王僧智等將  
帥四十六人其軍士得竄至江者縛筏以濟中江而溺  
流屍至京口者彌岸惟任約王僧惜獲免先是童謠云  
虜萬夫入五湖城南酒家使虜奴自晉宋以後經絰在  
魏境江淮以北南人皆謂為虜是時以賞俘買酒者一  
人裁得一醉丁巳衆軍出南州燒賊舟已未斬劉歸義  
徐嗣產傳野猪於建康市是日解嚴庚申誅蕭軌東方

老王敬寶李希光裴英起等太平元年九月壬寅帝進  
位丞相錄尚書事鎮衛大將軍揚州牧進封義興郡公  
庚申追贈皇考侍中光祿大夫封義興郡公謚曰恭十  
月甲戌梁帝勅丞相自今問訊可施別榻以近宸坐二  
年正月壬寅詔加帝班劍十人并前為三十丁未詔贈  
皇兄道談南兖州刺史長城縣公謚曰昭烈皇弟休光  
侍中南徐州刺史武康縣侯謚曰忠壯甲寅遣兼侍中  
謁者僕射陸繕策拜長城縣夫人章氏為義興國夫人

丁卯詔贈皇祖侍中太常卿謚曰孝追封皇祖妣許氏  
吳郡嘉興縣君謚曰敬皇妣張氏義興國太夫人謚曰  
宣二月庚午蕭勃舉兵自廣州度嶺頓南康遣其將歐  
陽顥傅泰及其子孜為前軍至豫章分屯要險南江州  
刺史余孝頃起兵應勃帝命周文育侯安都率衆討平  
之八月甲午帝進位太傅加黃鉞劍履上殿入朝不趨  
贊拜不名丙申加前後部羽葆鼓吹是時湘州刺史王  
琳擁兵不應命遣周文育侯安都率衆討之九月辛丑

梁帝進帝位相國總百揆封十郡為陳公備九錫之禮  
加璽綬遠游冠綠綬綬位在諸侯王上策曰大哉乾元  
資日月以貞觀至哉坤元憑山川以載物故惟天為大  
陟配者欽明惟王建國翼輔者齊聖是以文武之佐礪  
谿蘊其玉璜堯舜之臣滎河鏤其金板況乎體得一之  
鴻姿寧陽九之危厄援橫流於碣石撲燎火於崑岡驅  
馭於韋彭跨蹠於齊晉神功行而靡用聖道運而無名  
者乎今將授公典策其敬聽朕命日者昊天不弔鍾離

於我國家網漏吞舟彊胡內鼎茫茫宇宙慄慄黎元方  
趾圓顱萬不遺一太清否亢橋山之痛以深大寶屯如  
平陽之禍相繼上宰應運康救黔黎鞠旅於溟池之南  
揚旌於桂嶺之北縣三光於已隆謚四海於群飛光啓  
中興蕩寧上國此則公之大造於皇家者也旣而天未  
悔禍夷醜薦臻南夏崩騰西京蕩覆冢司昏撓旁引寇  
讐旣見貶於桐宮方謀危於漢閣皇運已殆何殊贅旒  
中國搖然非徒如綫公赫然投袂匡救本朝復莒齊都

平戎王室朕所以還膺寶歷重復宸居挹建武之風猷  
歌宣王之雅頌此又公之再造於皇家者也公應務之  
初登庸惟始孫盧肇釁越貊為災蕃部貼危勢將淪殄  
公赤旗所指祆壘洞開白羽纔撫凶徒粉潰此又公之  
功也大同之末邊政不修李賁狂迷竊我天愛公英暮  
雅算電掃風行馳御樓船直跨滄海三山獠洞八角蠻  
陬逖矣水寓之鄉悠哉火山之國馬援之所不屆陶璜  
之所未開莫不懼我王靈爭朝邊候歸睪天府獻狀鴻



臚此又公之功也自寇虜陵江宮闈幽辱而番禺連率  
本自諸夷言得其朋是懷同惡公仗此忠誠乘機勦定  
執沛令而釁鼓平新野而據寧此又公之功也世道初  
艱方隅多難公以國盜邊警知無不為恤是同盟誅其  
醜類南土黔黎重保蘇息此又公之功也長驅嶺嶠夢  
想京畿緣道酋豪遁為榛梗路養渠帥全據大都蓄聚  
逋逃方謀阻亂公龍驤虎步嘯吒風雲山靡堅城野無  
彊陣清祆氛於瀨石滅沴氣於霄都此又公之功也遷

任凶慝屯據大輦乞活類馬騰之軍流人多杜歿之衆  
公坐揮三畧遥制六奇義勇同心貌貅騁力雷奔電擊  
谷靜山空列郡無犬吠之驚叢祠罷狐鳴之盜此又公  
之功也王師討虜次屆淪波兵乏兼儲士有饑色公回  
麾彭蠡積穀巴丘億庾之詠斯豐壺漿之晷是衆故使  
三軍勇銳百戰無前承此兵糧遂殄凶逆此又公之功  
也盆壘猜攜用淹戎畧公志惟同獎師克在和屈禮交  
盟神祇感咽故能使舟師並路遠邇朋心此又公之功

也姑熟襟要嶠函所憑寇虜據其關梁大盜負其局鐫  
公一校纔撫三雄並奮左賢右角沙潰土崩鄂坂之隘  
斯開夷庚之道無塞此又公之功也義軍大衆俱集帝  
京逆豎凶徒猶屯皇邑公回茲地軸抗此天羅曾不崇  
朝俾無遺噍此又公之功也內難初靜諸侯出關外郡  
傳烽鮮卑犯塞公舟師步甲亘野橫江殲厥群氏遂殫  
封豕此又公之功也公克黜禍難劬勞皇室而孫寧之  
黨翻啓狄人伊洛之間咸為虜戎朝聞戎塵夜喧胡鼓

公三等既盡八陣斯張裁舉靈鉅亦抽金僕咸俘醜類  
患反高壩此又公之功也任約叛渙泉聲不悛戎羯貪  
婪狼心無改公左甄右落箕張翼舒掃是攬搶驅其獫  
狁投秦坑而盡沸噴渰水而不流此又公之功也一相  
居中自折彝鼎五湖小守妄懷同惡公夙駕兼道秉羽  
杖戎玉斧將揮金鉞且戒祇舊震懼遽請厭釘此又公  
之功也賊龕凶橫陵虐具區阻兵安忍憑災怙亂公雖  
宗居汝潁世寓東南眷言桑梓公私憤切戮此大憝如

烹小鮮此又公之功也同姓有扈頑凶不賓憑藉宗盟  
圖危社稷公論兵於廟堂之上決勝於尊俎之間寇賈  
樊滕浮江下瀨一朝翦撲無待旬師此又公之功也豫  
章祆寇依憑山澤繕甲完聚多歷歲時結從連橫爰洎  
交廣呂嘉既獲吳淠已擬命我還師征其不恪連營盡  
拔偽黨斯禽此又公之功也自八紘九野瓜剖豆分竊  
帝偷王連州比縣公武靈已暢文德又宣折簡馳書風  
猷斯遠此又公之功也京師禍亂亟積寒暄雙闕低昂

九門寥豁公求衣昧旦戾食高春興構宮闈具瞻遐邇  
郊庠宗稷之典六符十等之章還聞太始之風流重覩  
永平之遺事此又公之功也公有濟天下之勲重之以  
明德凝神體道合德符天周百姓以為心隨萬機以成  
務上德不德無為以為夏長春生顯仁藏用功成化洽  
樂奏咸雲安上御人禮兼文質是以天無蘊寶地有呈  
祥既景煥於圖書方歲隳於史牒高勲踰於象緯積德  
冠於萬華固無得而稱者矣朕又聞之前王宰世茂賞

尊賢式樹藩長總征郡伯二南崇絕四履遐曠泱泱表  
海祚土維齊巖巖泰山俾侯於魯況復經營宇宙寧惟  
斷鼇足之功弘濟蒼生非直鑿龍門之險而疇庸報德  
寂爾無聞朕所以垂拱當宇載懷慙慙者也今授公相  
國以南豫州之陳留南丹陽宣城揚州之吳興東陽新  
安新寧南徐州之義興江州之鄱陽臨川十郡封公為  
陳公錫茲青土苴以白茅爰定爾邦用建冢社昔旦奭  
分陝俱為保師晉鄭諸侯咸作卿士兼其內外禮實攸

宜今命使持節兼太尉王通授相國印綬陳公璽紱使持節兼司空王瑒授陳公茅土金虎符第一至第五左竹使符第一至第十左相國秩踰三鉉任總百司位絕朝班禮由事革以相國總百揆除錄尚書之號上所假節侍中貂蟬中書監印章中外都督太傅印綬義興公印策其鎮衛大將軍揚州牧如故又如公九錫其敬聽後命以公禮為楨榦律等銜策四維皆舉八柄有章是用錫公大輅戎輅各一玄牡二駟以公賤寶崇穀疏爵



待農室富京坻人知榮辱是用錫公袞冕之服赤舄副  
馬以公調理陰陽變諧風雅三靈允降萬國同和是用  
錫公軒縣之樂六佾之儔以公宣導王猷弘闡風教光  
景所照鞮象必通是用錫公朱户以居以公抑揚清濁  
褒德進賢髦士盈朝幽人虛谷是用錫公納陛以登以  
公嶷然廊廟為世鎔範折衝四表臨御八荒是用錫公  
虎賁之士三百人以公軌茲明罰期在刑厝象恭無赦  
千紀必誅是用錫公斧鉞各一以公英猷遠量跨厲嵩

淇包一車書括囊寰宇是用錫公彤弓一彤矢百盧弓  
十盧矢千以公天經地義貫徹幽明春露秋霜允供粢  
盛是用錫公秬鬯一卣圭瓚副焉陳國置丞相以下一  
遵舊式往欽哉其恭循朕命克相皇天弘建邦家允興  
鴻業以光我高祖之休命十月戊辰又進帝爵為王以  
揚州之會稽臨海永嘉建安南徐州之晉陵信安江州  
之尋陽豫章安成廬陵并前為二十郡益封陳國其相  
國揚州牧鎮衛大將軍並如故又命陳王冕十有二旒

建天子旌旗出警入蹕乘金根車駕六馬備五時副車  
置旌頭雲罕樂僂八佾設鍾虡宮縣王妃王子王女爵  
命之號陳臺百官一依舊典辛未梁帝禪位於陳策曰  
咨爾陳王惟昔上古厥初生人驪連栗陸之前容成大  
庭之世杳冥恍惚故靡得而議焉自羲農軒昊之君陶  
唐有虞之主或垂衣而御四海或無為而子萬姓居之  
如馭朽索去之如脫弊屣裁遇許由便能捨帝暫逢善  
卷即以讓王故知玄扈璇璣非關尊貴金根玉輅示衣

君臨及南觀河渚東沉刻壁菁華既竭耄勤已倦則抗  
首而笑惟賢是與謏然作歌簡能斯授遺風餘烈昭晰  
圖書漢魏因循是為故實宋齊授受又弘斯義我高祖  
應期撫運握樞御宇三后重光祖宗齊聖及時屬陽九  
封豕薦食西都失馭夷狄交侵乃臬天成輟弄龜鼎懔  
懔黔首若崩厥角徽徽皇極將甚綴旒惟王乃聖乃神  
欽明文思二儀並運四時合序天錫智勇人挺雄傑珠  
庭日角龍行虎步爰初投袂日廼勤王電掃番禺雲撤

彭蠡翦其元惡定我京畿及王賀帝弘貿茲冠復既行  
伊霍用保沖人震澤稽塗並懷叛逆獯羯醜虜三亂皇  
都裁命偏師二邦自殄薄伐獫狁六戎盡殪嶺南叛渙  
湘郢連結賊帥旣禽凶渠傳首用能百揆時序四門允  
穆無思不服無遠不届上達穹昊下漏淵泉蛟魚並見  
謳歌攸屬況乎長彗橫天已徵布新之兆璧日斯既實  
表更姓之符七百無常期皇王非一族昔木德既季而  
傳祚於我有梁天之歷數允集明哲式遵前典廣詢群

議王公卿尹莫不攸屬敬從人祇之願授帝位於爾躬  
四海困窮天祿永終王其允執厥中軌儀前式以副溥  
天之望禋郊祀帝時膺大禮永固洪業豈不盛與又命  
璽書遣兼太保尚書左僕射王通兼太尉司徒左長史  
王瑒奉皇帝璽紱受終之禮一依唐虞故事是日梁帝  
遜於別宮帝謙讓再三群臣固請乃許之永定元年冬  
十月乙亥皇帝即位於南郊柴燎告天曰皇帝臣霸先  
敢用玄牡昭告於皇皇后帝梁氏以圯剝薦臻歷運有

極欽若天應以命於霸先夫肇有黎蒸乃樹司牧選賢  
與能未常厥姓有梁末運仍業邁屯獯醜憑陵久移神  
噐承聖在外非能祀夏天未悔禍復惟寇逆嫡嗣廢黜  
宗枝僭詐天地板蕩紀綱泯絕霸先爰初授袂大拯橫  
流重舉義兵實戡多難廢王立帝實有厥功安國定社  
用盡其力是謂小康方期大道既而煙雲衣色日月呈  
祥除舊布新既彰玄象遷虞事夏且協謳歌九域八荒  
同布袞欵百神群祀皆有誠願梁帝高謝萬邦授以大

寶霸先自惟菲薄讓德不嗣至於再三辭弗獲許僉以  
百姓湏主萬機難曠皇靈眷命非可謙拒畏天之威用  
膺嘉祚永言夙志能無慙德敬簡元辰升壇受禪告類  
上帝用答眎心永保於我有陳惟明靈尚饗先是氛霧  
雨雪晝夜晦冥至是日景氣清晏禮畢輿駕還宮臨太  
極前殿大赦改元賜百姓爵二級文武二等鰥寡孤獨  
不能自存者人穀五斛逋租宿責皆勿復收有犯鄉論  
清議賊汚淫盜者皆洗除先注與之更始其長徒勅繫



特皆原之亡官失爵禁錮奪勞一依舊典又詔以江陰  
郡奉梁主為江陰王行梁正朔車旗服色一依前準梁  
皇太后為江陰國太妃皇后為江陰國妃又詔百司各  
依位攝職丙子幸鍾山祭蔣帝廟戊寅幸華林園覽辭  
訟臨赦囚徒已卯分遣大使宣勞四方庚辰詔出佛牙  
於杜姥宅集四部設無遮大會辛巳追尊皇考曰景皇  
帝廟號太祖皇妣董太夫人曰安皇后前夫人錢氏為  
昭皇后世子克為孝懷太子立夫人章氏為皇后癸未

尊景帝陵曰瑞陵昭皇后陵曰嘉陵依梁初園陵故事  
立刪定郎刊定律令戊子遷景皇帝神主祔於太廟是  
月西討都督周文育侯安都於郢州敗績沒於王琳十  
一月丙申封皇兄子長城縣侯蒨為臨川郡王瑱襲封  
始興郡王皇弟子曇朗襲封南康郡王庚申都下火十  
二月庚辰皇后謁太廟是歲周閔帝元年及九月冢宰  
宇文護廢閔帝而奉明帝又為明帝元年

二年春正月乙未以車騎將軍開府儀同三司侯瑱為

司空辛丑祀南郊大赦甲寅遣中書舍人韋鼎策吳興  
楚王神為帝戊午祀明堂二月壬申南豫州刺史沈泰  
奔齊辛卯詔司空侯瑱總督水陸衆軍以禦齊三月王  
琳立梁永嘉王蕭莊以奉梁後即位於郢州夏四月甲  
子祀太廟乙丑江陰王殂陳志也追謚梁敬帝詔太宰  
弔祭司空監護喪事以梁武林侯蕭諮子季卿嗣為江  
陰王戊辰重雲殿東鸛尾有紫煙屬天五月乙未都下  
地震壬寅立梁邵陵王廟室祭以太牢辛丑帝幸大

莊嚴寺捨身士戍群臣表請還宮六月己巳詔司空侯  
瑱領軍將軍徐度討王琳初侯景之平也太極殿被焚  
承聖中議欲營之獨闕一柱秋七月有樟木大十八圍  
長四丈五尺流泊陶家後渚監軍鄒子度以聞詔中書  
令沈衆兼起部尚書構太極殿八月周文育侯安都等  
於王琳所逃歸自劾廷尉即日引見宥之並復本官丁  
亥加江州刺史周迪平南將軍開府儀同三司冬十月  
庚午遣鎮南將軍周文育都督衆軍出豫章討余孝劬

乙亥辛莊嚴寺發金光明經題丁酉加高州刺史黃法  
甌平南將軍開府儀同三司十二月甲子辛大莊嚴寺  
設無礙大會捨乘輿法物群臣備法駕奉迎即日還宮  
丙戌加北江州刺史熊曇朗平西將軍開府儀同三司  
三年春正月丁酉鎮南將軍廣州刺史歐陽頔即本號  
開府儀同三司是夜大雪及旦太極殿前有龍跡見甲  
子廣州言仙人見於羅浮山寺小石樓二月辛酉加平  
西將軍桂州刺史淳於量鎮西大將軍開府儀同三司

夏間四月甲午詔依前代置西省學士兼取伎術士是時久不雨丙午幸鍾山祭蔣帝廟是日降雨迄於月晦五月丙辰朔日有蝕之有司奏舊儀帝御前殿服朱紗袍通天冠詔曰此乃前代承用意有未同合朔仰助太陽宜備袞冕之服自今永可為準丙子扶南國遣使朝貢乙酉北江州刺史熊曇朗殺都督周文育舉兵反王琳遣其將常衆愛曹慶率兵援余孝勣六月戊子儀同侯安都敗衆愛等於左里獲琳從弟襲主帥羊暎等四

十餘人衆愛遁走庚寅廬山人斬之傳首建鄴甲午衆  
軍凱歸丁酉帝不豫遣兼太宰尚書右僕射王通以疾  
告太廟兼太宰中書令謝哲告大社南北郊辛丑帝小  
瘳故司空周文育之柩至自建昌壬寅帝素服哭於朝  
堂哀甚癸卯上臨訊獄訟是夜熒惑在天尊上疾甚丙  
午帝崩於璿璣殿時年五十七遺詔追臨川王倩入纘  
大業甲寅殯於太極殿西階八月甲午群臣上謚曰武  
皇帝廟號高祖丙申葬萬安陵帝雄武多英畧性甚仁

愛及居阿衡恒崇寬簡雅尚儉素常膳不過數品私饗  
曲宴皆瓦器蟠盤肴核庶羞裁令充足不為虛費初平  
侯景及立敬帝子女玉帛皆班將士其充閭房者衣不  
重采飾無金翠聲樂不列於前踐阼之後彌厲恭儉故  
能隆功茂德光於江左云

世祖文皇帝諱蒨字子華始興昭烈王之長子也少沉  
敏有識量美容儀留意經史武帝甚愛之常稱吾家英  
秀梁太清初帝夢西日闔一大一小大者光滅隆地色



正黃其大如斗帝三分取一懷之侯景之亂避地臨安  
縣郭文舉舊宅及武帝舉兵南下景遣吳興太守信都  
遵收帝及衡陽獻王出都帝乃密袖小刀候見景欲圖  
之及至以付郎中王翻幽宇故其事不遂武帝圍石頭  
景欲加害者數矣會景敗乃得出起家吳興太守武帝  
之討王僧辯也先召帝與謀時僧辯壻杜龕據吳興兵  
衆甚盛武帝密令帝還長城立柵備之龕遣將杜泰乘  
虛掩至將士相視失色帝言笑自若部分益明於是衆

心乃定及武帝遣周文育討龔帝遣將軍劉澄蔣元舉  
攻下龔拜會稽太守武帝受禪立為臨川王夢梁武帝  
以寶刀授己周文育侯安都之敗於沌口武帝詔帝入  
總軍政尋命率兵城南皖水定三年六月丙午武帝崩  
皇后稱遺詔徵帝入纂皇統甲寅至自南皖入居中書  
省皇后令帝嗣膺寶籙帝辭讓至於再三公卿固請其  
日即皇帝位於太極前殿大赦詔州郡悉停奔赴秋七  
月丙辰尊皇后為皇太后辛酉以司空侯瑱為太尉以

南豫州刺史侯安都為司空以南徐州刺史徐度為侍  
中中撫軍將軍開府儀同三司乙丑重雲殿災八月庚  
戌立王子伯茂為始興王奉昭烈王後徙封始興嗣王  
頊為安成王九月辛酉立皇子伯宗為皇太子王公以  
下賜帛各有差乙亥立妃沈氏為皇后冬十月甲子齊  
文宣帝殂十一月乙卯王琳寇大雷詔太尉侯瑱司空  
侯安都儀同徐度禦之是歲周明帝改天王稱皇帝復  
建年號曰武成元年

天嘉元年春正月癸丑大赦改元詔賜鰥寡孤獨不能  
自存者人粟五斛孝弟力田殊行異等加爵一級甲寅  
分遣使者宣勞四方辛酉祀南郊詔賜人爵一級二月  
丙申太尉侯瑱敗王琳於梁山敗齊兵於博望禽齊將  
劉伯球王琳及其主蕭莊奔齊庚子分遣使者齎璽書  
宣勞四方己巳遣太尉侯瑱鎮益城庚戌立武帝第六  
子昌為衡陽王三月丙辰蕭莊所署郢州刺史孫瑒舉  
州內附丁巳江州刺史周迪平南中斬賊帥熊曇朗傳

首建鄴戊午齊軍棄魯山城走詔南豫州刺史程靈洗  
守之內子衡陽王昌沈于江夏四月丁亥立皇子伯信  
為衡陽王奉獻王後辛丑周明帝崩六月辛巳改諡皇  
祖妣景安皇后曰景文皇后壬辰詔改葬梁元帝於江  
寧舊塋車騎禮章悉用梁興仍依魏葬漢獻帝故事甲  
午追策故始興昭烈王妃曰孝妃辛丑國哀周忌上臨  
於太極前殿百僚陪哭赦建鄴殊死以下秋七月丙辰  
立皇子伯山為都陽王八月壬午齊孝昭帝廢其主殷

而自立戊子詔非兵器及國容所須金銀珠玉衣服雜  
玩悉皆禁斷丁酉辛正陽堂閱武九月癸丑彗星見乙  
卯周將獨孤盛領水軍趣巴湘與賀若敦水陸俱進太  
尉侯瑱自尋陽禦之冬十月癸巳侯瑱襲破獨孤盛於  
楊葉洲盛登岸築城自保丁酉詔司空侯安都率衆會  
侯瑒南拒周軍十二月己亥周巴陵城主尉遲憲降庚  
子獨孤盛潛遁走

二年春正月庚戌大赦辛未周湘州城主殷亮降湘州

平二月庚寅曲赦湘州諸郡三月乙卯太尉湘州刺史  
侯瑱薨夏六月己亥齊人通好秋七月丙午周將賀若  
敦遁歸武陵天門南平義陽河東宜都郡悉平九月甲  
寅詔以故太尉侯瑱故司空周文育故開府儀同三司  
杜僧明故中護軍胡穎故領軍陳擬配食武帝廟庭冬  
十月癸丑霍州西山蠻率部內屬乙卯高麗國遣使朝  
貢十一月甲辰齊孝昭帝殂十二月甲申立始興國廟  
於都下用王者禮以國用不足立煮海鹽傳及榷酤科

先是縉州刺史留異王琳丙戌詔司空侯安都討之  
是歲周武帝保定元年

三年春正月庚戌設帷宮於南郊幣告胡公以配天辛  
亥祀南郊詔賜人爵一級孝弟力田加一等二月梁宣  
帝殂閏月己酉以百濟王餘明為撫東大將軍高麗王  
高湯為寧東將軍江州刺史周迪舉兵應留異甲子改  
鑄五銖錢三月丙子安成王頊至自周丁丑以安右將  
軍吳明徹為安南將軍江州刺史督衆軍南討甲申大



赦庚寅司空侯安都破留異於姚支嶺異奔晉安東陽郡平夏四月癸卯曲赦東陽郡乙巳齊人來聘秋七月己丑皇太子納妃王氏在位文武賜帛各有差孝弟力田為父後者賜爵二級九月戊辰朔日有蝕之以侍中到仲舉為尚書右僕射丁亥周廸請降

四年春正月丙子于阗利國遣使朝貢甲申周廸走投閩州刺史陳寶應納之夏四月辛丑設無礙大會捨身於太極前殿乙卯加驃騎將軍楊州刺史安成王項開

府儀同三司六月癸巳司空侯安都賜死秋九月壬戌  
開府儀同三司廣州刺史歐陽頠薨癸亥曲赦都下辛  
未周廸復寇臨川詔護軍將軍章昭達討平之冬十二  
月丙申大赦詔昭達進軍建安討陳寶應

五年春三月壬午詔以故護軍將軍周鐵虎配食武帝  
廟庭夏五月周齊並遣使來聘秋七月丁丑曲赦都下  
九月城西城冬十一月己丑章昭達禽陳寶應留異送  
建鄴晉安郡平甲辰以護軍將軍章昭達為鎮軍將軍

開府儀同三司十二月甲子曲赦建安晉安二郡討陳  
寶應將士死王事者並給棺槨送還本鄉并復其家癸  
未齊人來聘

六年春正月甲午皇太子加元服王公以下賜帛各有  
差孝弟力田為父後者賜爵一級鰥寡孤獨不能自存  
者穀人五斛夏四月甲寅以開府儀同三司揚州刺史  
安成王瑱為司空五月齊武成帝傳位於太子緯自號  
太上皇帝六月辛酉彗星見於上台北周人來聘秋七

月癸未有大風自西南至廣百餘步激壞靈臺候樓甲  
申儀賢堂無故自壞丙戌臨川太守駱牙斬周廸傳省  
建鄴棗於朱雀航八月己卯立皇子伯固為新安王伯  
恭為晉安王伯仁為廬陵王伯義為江夏王九月新作  
大航冬十月辛亥齊人來聘十二月乙卯立皇子伯禮  
為武陵王癸亥曲赦都下

天康元年春二月丙子大赦改元三月己卯以司空安  
成王頊為尚書令夏四月乙卯皇孫至澤生賜在位丈

武帛各有差為父後者賜爵一級癸酉皇帝崩於有覺殿遺詔皇太子可即君臨山陵務存儉速大斂竟群臣三日一臨公除之制率依舊典六月甲子群臣上謚曰文皇帝廟號世祖丙寅葬永寧陵文帝起自布衣知百姓疾苦國家資用務從儉約妙識真偽下不容姦一夜內刺聞取外事分判者前後相續每雞人伺漏傳籤於殿中者令投籤於階石上鎗然有聲云吾雖得眠亦令驚覺其自彊若此云

廢帝諱伯宗字奉業小字樂王文帝嫡長子也梁承聖三年五月庚寅生永定二年二月戊辰拜臨川王世子三年文帝嗣位八月庚戌立為皇太子自梁室亂離東宮焚燼太子居於永福省天康元年四月癸酉文帝崩是日太子即皇帝位於太極前殿大赦詔内外文武各復其職遠方悉停奔赴五月己卯尊皇太后曰太皇太后皇后曰皇太后庚寅以司空揚州刺史新除尚書令安成王頊為司徒錄尚書都督中外諸軍事丁酉以中

軍大將軍開府儀同三司徐度為司空以鎮東將軍東揚州刺史始興王伯茂為征東將軍開府儀同三司以吏部尚書袁樞為尚書左僕射以吳興太守沈欽為右僕射秋七月丁酉立妃王氏為皇后冬十月庚申享太廟十一月乙亥周人來弔十二月甲子高麗國遣使朝貢是歲周天和元年

光大元年春正月癸酉尚書左僕射袁樞卒乙亥大赦改元賜孝弟力田爵一級辛卯祀南郊二月辛亥南豫

州刺史余孝頃謀反伏誅三月甲午以尚書右僕射沈  
欽為侍中尚書僕射夏五月乙未湘州刺史華皎不從  
執政丙申以中撫軍大將軍淳于量為征南大將軍總  
舟師討之六月壬寅以中軍大將軍司空徐度為車騎  
將軍總督都下衆軍自步道襲湘州秋七月戊申立皇  
子至澤為皇太子賜天下為父後者爵一級王公以下  
賚帛各有差九月丙辰百濟國遣使朝貢是月周將拓  
拔定入郢州與華皎水陸俱進都督淳于量吳明徹等



大破之皎單舸奔江陵禽定送建鄴冬十月辛巳曲赦  
湘巴二州為皎所誅誤者十一月甲子中權將軍開府  
儀同三司王沖薨十二月庚寅以儀同三司兼從事中  
郎孔英哲為奉聖亭侯奉孔子祀

二年春正月己亥司徒安成王頊進位大傅領司徒加  
殊禮以新除征南大將軍淳于量為中軍大將軍及安  
南將軍湘州刺史吳明徹即本號並開府儀同三司庚  
子詔討華皎軍人死王事者並給棺槨送還本鄉仍復

其家甲子司空徐度薨夏五月丙辰太傅安成王頊獻  
玉璽一六月丁亥彗星見秋七月戊申新羅國遣使朝  
貢壬戌立皇弟伯智為永陽王伯謀為桂陽王九月林  
邑狼牙修國並遣使朝貢冬十一月甲寅慈訓太后令  
曰伯宗昔在儲宮本無令問及居崇極遂騁凶淫太傅  
親承顧託義深垣屏而攢塗未御翌日無淹仍遣劉師  
知殷不佞等顯言排斥陰謀禍亂賴元相維持但除君  
側又以余孝頃密邇京師便相徵召宗社之靈祇氛是

滅於是密謂華皎稱兵上流國祚憂惶幾移醜類又別  
勅歐陽紇等攻逼衡州嶺表紛紜殊淹弦望但賊豎皆  
亡日望懲改而悖禮忘德情性不悛盪主侯法喜等太  
傅麾下恒游府內啗以深利謀興肘腋又盪主孫泰等  
潛相連結大有交通天誘其衷自然開發此諸文迹今  
以相示豈可復肅恭禋祀臨御生靈今可特降為臨海  
郡王送還藩邸太傅安成王固天生德齊聖廣深二后  
鍾心三靈佇眷自前朝不豫任總邦家威惠相宣刑禮

兼設且地彰靈璽天表長彗布新除舊禎祥咸顯文皇  
知子之鑒事甚帝克傳弟之懷久符太伯今可還中舊  
志崇立賢君中外宜依舊典奉迎輿駕是日帝出居別  
第太建二年四月乙卯薨時年十九帝性仁弱無人君  
之器及即尊位政刑皆歸冢宰故宣太后稱文帝遺志  
而廢焉

論曰陳武帝以雄毅之姿屬殷憂之運功存拯溺道濟  
橫流應變無方蓋惟人傑及乎西都盪覆江表貼危僧

辯任同伊尹空結桐宮之恨貞陽入假秦兵不息穆羸  
之泣帝乘隙以舉乃蹈玄機王業所基始自於此柴天  
改物盖有憑云文帝以宗枝承統情存兢惕加以崇尚  
儒術愛悅文義恭儉行已勤勞濟物志度弘遠有前哲  
之風至於臨下明察得永平之政矣臨海懦弱有同於  
帝摯文后雖欲不鑒殷道盖亦其可得耶

南史卷九

南史卷九考證

陳武帝紀封新枋縣子○陳書封新安子與此小異  
勃遣腹心譚世遠為曲江令○前卷梁太平二年三月  
內稱衡州刺史譚遠蓋以避諱故去世字也茲復作  
世遠前後互異如此

帝先計軍糧五十萬石○計陳書作貯

乃以舩舫貯石沈塞淮口○舩監本誤般今从梁書改  
正

十一月己卯齊遣兵五十度據姑熟○度陳書作濟渡  
楚州刺史劉士榮○士梁書陳書皆作仕

鞠旅於溟池之南○溟陳書作漠

呂嘉既獲吳澤已縱○縱監本作縱今从陳書

金虎符第一至第五左竹使符第一至第十左○陳書  
無第二左字乃脫去也

壬寅立梁邵陵攜王廟室祭以太牢辛丑帝幸大莊嚴  
寺捨身○先壬寅而後辛丑不知何以顛倒至此陳



書武帝紀永定二年不載立廟室事又辛丑作辛酉  
甲子廣州言仙人見於羅浮山寺小石樓○上云正月  
丁酉下云二月辛酉則此二十六日內當是庚子或  
壬子此作甲訛也若陳書作甲午則更訛矣

丙子扶南國遣使朝貢○丙子陳書作丙寅

文帝紀十月癸丑霍州西山蠻率部內屬乙卯高麗國  
遣使朝貢十一月甲辰齊孝昭帝殂○癸丑陳書作  
乙巳又乙卯上有十一月三字與此小異

丙戌臨川太守駱牙斬周迪○駱牙陳書作駱文牙  
廢帝紀六月丁亥彗星見○丁亥陳書作丁卯

此諸文迹今以相示○此監本作比今从陳書及閣本

南史卷九考證